

四庫全書

集部

欽定四庫全書

集部
藝齋文編卷二

詳校官起居注主事臣顧崇泰

主事臣呂雲棟覆勘

謄錄監生臣嚴續曾

謄錄監生臣俞光豫

欽定四庫全書

集部四

提要

彞齋文編四卷

別集類三宋

臣等謹案彞齋文編四卷宋趙孟堅撰孟堅

字子固自號彞齋太祖十一世孫其先以安

定郡王從高宗南渡家於嘉禾之廣陳鎮而

孟堅自作告墓文中又作廣成蓋俗語相沿

初無定字至元嘉禾志載廣陳鎮在海鹽縣

東北九十里則孟堅當為海鹽人其或作嘉興者誤也孟堅以宗室子登寶慶三年進士好學工書喜藏名蹟時人比之米芾至今遺墨流傳人人能知其姓字惟其生平始末則諸書所紀往往不同如周密齊東野語謂其終提轄左帑身後有嚴陵之命是孟堅歿於宋世而姚桐壽樂郊私語謂孟堅入元不樂仕進隱居避客從弟孟頫來訪坐定問弁山

笠澤佳否孟頫云佳孟堅曰弟奈山澤佳何
既退使人濯其坐具云云則又似元初尚存
者二說錯互殊甚今案孟堅甲辰歲朝把筆
詩有四十五番見除夕之句以干支逆數之
當生於慶元己未距宋亡時凡七十八年孟
頫仕元尚在其後孟堅必不能及見又考朱
存理鐵網珊瑚載孟堅梅竹譜卷有咸淳丁
卯葉隆禮跋稱子固晚年工梅竹步驟逃禪

予自江右歸將與之是正而子固死矣跋出
隆禮手蹟其言可信是孟堅之卒於丁卯以
前更為確鑿亦足證桐壽之說為誕妄矣至
其歷官次第他書不載而見於詩文自述者
如為湖州掾入轉運司幕知諸暨縣以御史
言罷歸皆歷歷可考獨不言其嘗為朝官宗
詩紀事乃謂其景定初遷翰林學士又不知
何所據也其集宋史藝文志不著錄惟見於

明秘閣書目者四冊世久失傳今從永樂大典摭拾補綴釐為四卷大都清遠絕俗類其為人剝壁零珪風流未泯亦足與書畫並傳不朽云乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

欽定四庫全書

藝齋文編卷一

宋 趙孟堅 撰

賦

吐綬鷄賦

嗟爾禽豸華彩之殊於羽翰表均圓而珠匪璫匪刻密
踈孰鋪鍾星精於蚌胎乃賦彩於爾軀固已不儕於埜
鶩迥間於飛鳧矣頤頷之垂更稟異質五色相宣有藏
斯密乍展乍縮若虛若實彬然而彰以時而出此又造

物者神其幻相不可致詰者也若乃藥堦晝長蕙圃風
暖茸草平細細沙軟日輪卓午花陰將轉飲啄既厭
振刷微倦支體融怡翎翮敷闡百骸暢而自恣真閔形
而莫掩撼首騰吻伸喙迅膺乍露層碧中明錯金婀娜
離披絢爛深沈文理橫陳宛丹符之疊篆緣飾繚繞訝
翠羽之垂襟五雲書銜將飛詔百衲錦掛向當心衆目
詫視兮不敢迫近靈機自愛兮返顧沈吟怒目凝注紺
髮森峙翠眉雙妍鳳披獨異漸然斯張竟為嫵媚初筓

迸於犢角漸竹批於馬耳彎拳前屬精緊交麗故睨而
視之曰吐綬以呈竒眩而惑之者謂非形而以氣豈識
方寸之間不倫不類可大可小有張有弛邪於是斂彼
輝煌屏若退藏盡忘所有舉止如常有隱君子見而歎
曰是所謂明哲保身不顯其光也夫吾聞鹿以走險麝
為生香已之所累在有其長此禽雖稟文華不常宣露
時然自娛卷舒有度其養晦也藏器其覽輝也遇主可
不取則為吾出處知格物以書紳因援毫而成賦

石菖蒲賦

天台石橋佛仙所居境聯鴈峰厥生宜蒲劍挺分脊虎
擢奮鬚維水清而石硬產勁質之伊殊較他山之蔓生
蓋烈士而腐儒巖壑之阿風日不到地脉所潤澹泊自
如又疑得道以逍遙不踐名疆而利塗山僧埜夫鑿竒
品異搜取來歸得亦匪易臨峻崖之十尋凜束身而下
絕或續以長竿之裊或刺以纖鉤之利自非好尚之孤
高孰肯鍾情之及是乃漬以清泉藉之文石玉峰之蠹

蜂房將樂之珍雪色齊安子供艾若指螺曲陽盆盛浪
翻瓊液壅沙屑金封苔澡碧於以滋生息於以安野逸
搢紳先生綺紈公子膏梁厭飲興馬赫奕乍而見之神
爽心懌欲頓忘乎肉食於是移置雕欄擎擡文几續犀
筋以鑷塵雨犧樽而鍾水夕淒清露之下晝蔭花陰之
底其所以愛護者彌至然未閱月而根糜甫浹旬而色
瘁者何哉顧乃過尤懈怠於臧僕疑被侵陵於蟲蟻豈
清虛富貴迥不同方鐘鼎山林未容兼美徒使唐嘉祿

莖之清風漢慕赤松之高致曩齋處士從旁而嘻曰我知之矣請言所以余見隱徒其室方丈人跡罕至景密護其南榮苔欲生而滿地羅列峰巒奠陳壘洗脩踈數劔倚壁蒼翠水僅濡而不盈根頻受而勿施每指一而問年動歷閏而逾紀靜定純一有終有始寒煖燥濕不遷不徙厥無竒方唯安汝止彼其愛之適以害之特未諳乎此理方梅霖驟至浸淫滂沛根聯絡於銀絲主人為之欣喜不知力既下分葉枯而萎紛九節之連延乍

叢然而森起亦猶飽豢於肥甘壽劣休糧之士其所以
約水護根經年養力葉老滄浪亦煉形之術耳又況勤
怠殊方炎涼易位不常厥居朝三暮四何異爪皮驗生
拔本觀密有愧索馳之子此言雖適中有深旨請書以
資養生豈但曰蒲而已

五言古詩二十三首

上習庵陳先生

厥聞忠孝者所出同一源子於所親孝移忠理必然親

賢亦子訓忠節貴兩全殺身能成仁揚名斯永延是亦
孝所在豈但知色難嘻其叔世風本末嗟倒懸若曰能
養耳食美衣華鮮苟求胡弗至側媚諂笑肩彼其良自
多喟歎達者觀向來歐陽公拓落夷陵年夫人告之公
淡泊吾所安慎毋為險變守節當彌堅卓哉名母訓紀
歷伊誰傳恭惟奉常君矢心直似弦立朝幾抗論凜凜
高回天力甦憤憤徒若障狂瀾川人知君守固當識君
母賢想其勉勵時諄勤誨膝邊怡愉一領解心注靡變

遷升而高為天下而沉為淵但知慈訓在此外浮雲焉
茲來從吏隱斲屋新數椽曲檻花歲蕤虛窻月嬋娟雅
意寓一賦懦立貪以廉我誦順親記有淚如迸泉我貧
母亦老冉冉髮已宣家徒空四壁簞笥笑且便惟虞官
箴曠勿以溫飽牽澤深百川赴火明斯聚蟬投君以臭
味君子毋棄捐

仲弟借書持要不謹護有損為之覆背葺還

昔聞勤讀者三度絕韋編讀書書已破書則在肺肝摘

寶咀其華發揮事業間伊惟事精妍整束懸牙籤縹囊
手未觸慨是龍泉言虎子畜溪魚汝惜未鑿顛胡策追
元方紛紛探簡編抱書手不龜面壁縛枯禪靴化例隨
水竟負一瓶還季也怒生癭我慚家訓顏願季無銜怒
鳳樓修則完嗟嗟仁義諫束濕何由痊顛倒幸爾存柿
葉風掀掀糊老飽九炊紙搗翼擬蟬翻翻事兼兩滑膩
好且堅手鑿具在茲秋露無重妍舊書百回讀訓佩坡
老僊請季事斯語慎勿高閣懸因憐數置藏徒疥小印

存浮雲忽白衣世事無不然眼底不自快封閉何取焉
所貴得之心亦可忘蹄筌又憐園大塊華好竟飽鮮一
飽羶聚蠅曷與千古傳纖雲飛四散皎月標中天

贈筆工吳昇

蘭臺上狸毛山谷愛雞距物勝因人成雅製傳自古風
流渡江初筆翰猶朴魯曾窺上方製遺範典刑具寸簪
束萬穎瞻足飽霜兔豐融沛行墨充實自妍富行間得
茂密夫豈窘尺度澆浮自趨薄言羸劣醜畢露清快誇鈞

心節括號釵股纖纖銛甚錐祗便庸書伍殺鋒出光芒
苗枯旱無雨齷齪癡凍蠅安能刷石怒爾來邈東嘉法
則自誰祖究見昔製作齊力萬毫努吾欲標諸人示茲
明取與斲雕還反樸淳風招已去春苗異蘆筍廣袖謬
織組誰能一羽力回彼滔滔注百爾今已然豈但於筆
故

題黃岳夏氏曉山亭詩卷

元暉工畫山最識山之趣每言籠朝雲乃是竒絕處君

家結幽亭兩峯正當戶窳堵冠其巔雲中雙筆露宗老
為扁名得自昌黎句相當卷書坐塌篔簹遮吟賦是時神
宇泰白雲未飛去滄然截山腰素練初橫布須臾朝陽
升景象幾更互盤旋宛遊龍披離擘輕絮春漸苒而泮
青烟惟一縷霏微辨岡巒歷落分島嶼露晞如膏沐蒼
翠盡還故松針與篁叢貫穿珠無數應接良不暇詩料
亦既富只憂紅塵生分我淡思慮更須清夜來四更者

月吐

詩談

吾嗤彼云士努力事詩妍竟日搜枯腸抽黃對白間爾
何無達觀跼促自縛纏不見淵明陶有詩累百篇要以
寫吾心出語如流泉採菊見南山得句於悠然少陵動
感慨忠義膽所宣有時心境夷亦復輕翩翩纖纖白雲
閑無心遊日邊風石激而竒奔迸生雲煙詎以天然態
而事斧鑿鑄陶爾一觴酒警爾心地偏少焉明月上高
掛西山巔聽我曳杖歌金石聲撼天

萬壽寺避暑讀書

梵寺齋殿深屋古洞陰冷火雲自空飛此地暑盡屏乍
至心已清坐久體如冰官清務乃簡居易事亦省是為
臭味同玉碎金無礦蕭閑日追隨論辯當脩省展書相
對讀佳處擊節猛興阜謂前茲文會無許盛觴詠直寄
耳沈酒夫豈肯過從奚厭密交道久彌敬無令數斯踈
此語共知警

為倉使吳荆溪先生壽

人祝先生壽勲名而福祿伊惟小門生而迺異斯祝所
祝在斯文其壽非已獨嘗聞侍席言櫟括因以復孔孟
至皇朝文與道相屬溯自熙豐後專門始分目歐蘇以
文雄周程理義熟從此判而二流派各異躅偉哉水心
葉同軌混列輻綮雲錦章理義仍炳燭筠牕一傳後
人已沾膏馥正統的屬任非公紹者孰鯁生耳聞此驚
詫歎不足因捧介壽卮譜在歌詩軸願言清節高歲寒
等修竹長以文鳴道聲金而振玉上而軋漢周俯命騷

以僕門生嚴措法剩將從紀錄

漕使李寶文先生除宣城守

幕客崇酒觴渠渠餞行舟先生蘸甲飲不使涓滴留持
盞顧謂言汝復能吟不爾不歌吾行而俟吾言求沃爾
滿鍾酒畀爾筆力道扶輿懜懜醉夢化蝴蝶遊夜分起
展燭落筆尊絲柔請歌先生行真與人不侔前者亦云
歸金帛困載收今惟明月耳舴艋輕浮浮視彼掇斂徒
推剝藜怨尤逮其去國日競欲瓦礫投此乃戀寬恩說

着涕泗流國用既云裕民瘡亦云瘳而令分左符遠從
牧山州投鼠戒忌器矧我無是謀彈烏或驚鸞盍亦謹
厥籌茲焉皆汨汨去矣從休休伊惟小門生莫計攀前
轡彌溪桃花水舟行願悠悠行有賜還詔佇立螭坳頭

拜范文正公祠

瘦石插半天玲瓏聳蒼翠想從混沌初有此紛破碎斷
截不分離欹危不顛墜乃於其中間穿沁石路細頻勞
謝屐行捫撫足幻怪下有泉溶溶根來從石背香山纔

品題名得因人貴瘦筇行清秋西風吹我袂躋攀幸未
疲俯仰一歎喟下山拜范祠遺像儼如在胸中萬甲兵
曾使西夏畏巖瞻石不移可想鐵肝肺嘻其羣小人風
林犬空吠於今孰存亡取捨良亦易但堅自力心歲寒
見節槩卓爾彼何人晞之則亦是

詠史贈王侍御

昔有陽城子高卧中條山粵從丹詔聘職諫居朝端北
垣七八年一詞曾靡殫於中常戚戚事以秦越者諍臣

論一篇見誚昌黎韓城日洽壺觴視之無汗顏一朝天子誤鼎鬲庸雄姦皇皇朝楚人敢議不敢言城曰茲可矣不言吾豈安當廷壞其麻勢若迴狂瀾臣言不可奪臣肉所可剜孰謂雄猜主天聽亦為還一鳴必驚人朝陽之祥鸞一飛必衝天北溟之鵬搏啾啾燕雀輩終歲寒簷間君今踵其武可想倚任專士習弊滋久未易一匕痊遺臭偃月姦殆今逾百年利欲錮人心深矣莫洗湔幾新更化機仍溢膠柱弦洗泥何能清救弊應其源

昔無起樓地今舉田連阡而以求善治却行而欲前復
有事誕街奮臂張虛拳驅虎戕良民臧否已較然膠舟
倚航海惻聳憂世肩夷甫在晉朝舉世無幾先卓哉辯
姦論萬世一老泉瞽言再拜獻感憤涕泗連昔者漢更
生危言扶彼顛皎余明寸心不向流俗宣維君中流柱
屹是障百川向來稍詭遇高官懷袖間耿介甘不售歲
寒松栢堅國無君子哉緘默誰復言松江千頃浪涵月
金蜿蜒於茲送君行商歌頻扣舷明當重回首晚風揚

柳邊佇希御史雨迅掃靖幅員

放生池碑

維書號心畫於以觀厥德堂堂太師顏忠義挺不屈怒
張鐵柱立凜若罵蔡賊蠶頭而蠶尾屋漏而壁拆豈事
筆端求要自心胷出心源儻匪正馬謖按圖索君侯冰
玉清一點塵不入擺脫世緣盡四壁無良物源清流應
隨心同寧異跡前年鎮雪城清風貪者格人言政化明
如仕唐大厯人言八法具儼是浯溪刻卑棲小李掾松

茂悅見栢甚欲事灑掃筆硯供洗滌官身類匏繫唯向
清夢覩手搨魯池碑潢騰寄遠驛既異裹苞苴抑匪徒
掛壁舉目見顏公英氣聳辟易又若小子勤祇莊常侍
側

別贈陳新叔弟

神靈造天極仁深祚綿遠光堯渡江初屬族扶日輦南
來逾百年瓜瓞載繁衍開江一枝燈海濱發長鯨紹興
庚辰第伯祖維創見自此燈燈續儒科已累踐姪也幼

則孤門戶中屯蹇執編青衿後浪策禮部選有叔行泝
親隔驀此異開天都邂逅初覲面苦恨晚為言起家難
銖積勤靡倦相從忽問勞把臂互驚嘆雪城每頻過訪
我李曹掾及茲脫選海幾擬謝深眷三年在奔波留滯
顏色醜扁舟此經從相見笑而莞排日羅酒漿延顧禮
既腆所欣廷蘭秀一一莫可揀讀書固有獲而况多積
善竇桂未足誇王槐定應顯願言闡宏規涵肆觀文典
士業止科名耕耨工亦淺胷中澆萬卷落筆自精悍何

當它年來大雅見文憲功名固懸命立志毋狹福微言
勿謂迂聊作友于勉

乙未春初解漕幕兼職訪秋壑西湖探韻得柳
字

浮生恍流萍聚難別易久經年稀會面感歎兩執手佳
賓稍翕集歷落馬蹄驟競誇搞錦文雄騁翻河口主人
金叵羅頗費黃封酒環坐松下亭海納翕敷受飲酣氣
張王聯題健揮肘山凹日斜射簷額風穿逗恨無秉燭

金川人三
卷一
遊以夜繼斯晝聊追擘韻戲嶮窄互呈鬪分攜上木蘭
漾漿幾回首遙追飛蓋歸數徧蘇堤柳

必大弟赴新城簿

乃翁換官班幾鬱青雲志晚以身徇國而得祿及嗣妙
年當撫仕應識珍重此簿領職任輕正合親文史東安
吾舊遊山水清且美編戶雖不稠而亦有文士擇友如
擇木所貴高於已遊觀固有時要在不踰禮飲爵不過
三馬向坦塗履幕府儻留連謹抑如處子切勿事軒昂

攻者蠶蝟起我已慣嘗此說病乃真意第守謙謙心由
天工處置命透如春回不壓重石底爾祖積善在造物
報必侈以我苦澁詞普告兄與弟莫怪欠誇諛食橄有
回味謂余言不信識者試質以

辛丑孟夏甲申日得雨

物理寓乘除天存好還道去年夏迄秋旱枯苗盡槁繁
霜打麥根療饑茲已兆逾春秀萋萋修翠搖旌葆黃雲
割未盡赤日仍杲杲秧針方刺牙還憂水泉少正深傷

弓虞曲成由大造耕雨刈欲晴從來難兩好來年迨既
登甘霖乃方到甲申占久雨古語信可考首夏際茲辰
其應孚未禱繁聲喧若注陰雲陣如掃入夜聽簷溜滴
瀝響到曉蝗螟腐翅翼蛙黽喊池沼從茲雨未艾調潤
知可保一畝數石收麥秋功已告千倉而萬箱應占富
禾稻匪藉天功然人力寧爾巧端由政致和天示賢侯
報不死見豐年鼓腹歸醉飽未掾與農氓熙熙歌皞皞

夜飲歸戲作

夜雪合三更崑崙兵密渡常時喜慨談此夕若親親杯
行數已長談辯氣掀舉微酣上籃輿迢迢向歸路出門
林盡白飛雪正零舞苦寒嗟僕夫鼃跛良窘步北風惡
打頭滅燭失四顧平生功名心每作艱危慮小試應危
機卻輿自行去脚力幸未衰乘之酒力怒踏雪如踏雲
了不見辛苦尚奚畏泥塗寧卹雙靴汗僕夫莫余追瞥
若肘生羽騫騰甫登橋健翎已逾兔還歸坐中堂長嘯
默不語絲鬢且勿生未謂余不武夜雪向桑乾立勲期

晚暮凜凜金石心捐軀事明主

九三月丹

昔人登弁山得此花園工有九三者忘其姓為接度種今徧茗雪號曰九

三月丹

有花血媽紅侈娛大於碗五出猩袍裂萬攢金釘滿數
日色彌鮮不畏風日暖山茶越丹葦馬塍豐土產殊名
幾百種並立色俱赧客言名之由其說鄰怪誕昔有樵
弁山絕頂路迷返見此物尤異斲置歸里閉九三索馳
流厥藝工養恭惟以第行稱姓名微考按香泥密封籜

接度根暗換若古姚魏然因從九三喚從茲入西浙移
根遍名苑家家尚此花買價不論貫青油障曉日朱檻
護雕瓚微物因人成感此一喟嘆憶昔洛陽花壽安紅
為冠要其所從出亦自薪樵伴伊維花卉流第以色媚
眼青青三寸松養可凌霄漢明堂須衆木未易一材辦
工師無遐遺材滿巖崖畔

題吳門顏氏敬享亭石記

贈一齋

螺贏祝類我慈烏知反哺伊人矧最靈而不以斯故養

雖數羽毛初志亦辛苦懷哉肯堂念寥寥幾千古君其
若而人悽愴踐霜露欽聞先君子清白守儒素何以遺
後人多文以為富潭潭詩書府魚魚禮法度王槐信厚
成竇桂陰德著雪玉塵不緇鍾美見垂裕勤修不自悶
刺詞流肺腑應無忝厥紹錫類及噲伍卑飛未仰報有
淚滂如雨山高不礙天水流必東注願言堅此心宜詣
聖賢處他石或可攻庸效南陔賦

題陳山龍祠

白龍生陽山龍生龍母死於何藏斯陳其說從古始豈
伊冥邈中而亦有地利季春旬八日歲歲雨冥晦龍下
大如柱萬目儼駭視謂龍來朝母人胡不知禮邑人嚴
奉供神宮聯梵寺龍君與龍母居中堂殿位兩廡香火
誰分祀及四子山腰有龍湫泓澄一掬水水旱不涸溢
甘冽冷牙齒禱雨乞一滴闔境得沾濟昔年令君來灑
酒方奠啟有物蜿蜒見舉體金色被巡汭上巾幘馴狎
了無畏令君端笏迎迎入香奩裏誕四子如粟久矣傳

神異逮置湫石邊倏與電俱逝或示夢畫工畫龍耍珠
戲或載見蜿蜒躍戲花壺際神靈及事怪龔碑詳紀記
迎享送三辭上軋騷章麗荔子丹焦黃羅池未專美余
來擊節誦金石歌聲曳邇年又喧傳其說更譎詭後殿
方落成將以奉大士一夕大風雨巨石暗飛墜高高山
頂來直頓殿堂內端然一寶座不偏亦不倚既無繩墨
量誰與安位置不知幾鬼推毋廼陰兵徙是為鬼龍力
其說信有以又云虎新過泥沙印遺趾爬抓大木皮畫

畫有文理海山斷不連四望惟茅葦又無穴宅居此物
從何至有龍必有虎神驅理或爾不然虎尊龍墓前來
伏跪想當清夜月蹉跎安其尾談玄與訊怪更僕良未
已笑呼金叵羅一把詩腸洗數酌帶微酣長嘯奮雙袂
徑直上山巔惟如履平地海神會我心卷浪雪花沸中
年脚尚健有志聊自喜下山猛捉筆揮掃不停臂素壁
兩三間掀舞龍蛇勢

重賦暨邑池亭

新沐試締綌涼生神骨清髮踈逗風爽半幅紗巾輕道
遙池上亭綠陰取次行清和又重見時序無留停叢委
簿書間那得散漫情乍此偷隙閑雲開月斲明故園松
菊荒蛛網罩南榮琴書知好在奧窅誰為評

憲使陳習菴先生除司業

連宵對涼月間吟祖行篇攬挹南卉香入句期清妍迨
隨剪吳江送君翔九天豈為兒女情戀戀祈恩憐茲惟
時多虞活國資清賢近者小司業絲之入諫垣

古劍詞

古劍三尺長土花上鱗甲幾年閉蟄藏射斗光夜發提
攜繞區市鮮復事磨刮嫖姚一拂拭蛟斷犀可截志士
寧終窮行逢達觀達

曲澗

山頭分兩崖知有泉來處曲澗漱琮瑋夜來應驟雨葉
嫩明琉璃藤生絡松樹石脚漲所痕莓苔濕無路玩之
室生白明是春將暮何當門對開小結幽廬住

七言古詩十五首

江灣僧舍水石芭蕉

老耳最怕風雨聲
芭蕉葉上聲偏鳴
新枝日展翦不替
况見戢戢成添丁
呼童具錡斲寒玉
蔓圖貴早除其萌
醜疑烏啄側着附
又訝蹲鴟不可羨
一笑翻成有料理
古盆石供泉清冷
黃梅彌旬雨霖霖
苔封沙擁生意成
小試抽書噓撚細
鼠牙入水銀鬚生
漸離土性安臞瘠
淡與水石相忘形
巡除日課長養事
莖添葉比紛欹傾

炎威不到琉璃碧水脉透尖珠貫縈萼綠華仙斷火食
雲裾曳翠身輕盈風軒暑簟足蕭爽晴曦更有冬窓明
丁寧閑塞謹愛護秋霜夜氣防憑凌一年一年春風好
根株宛在葱蘢青崇桃遮莫金壺貯日暮隨風紅雨零

登普滿塔

海濱荒涼斗絕地古寺窳堵標蒼昊三面黃茅連巨浸
突立嵯峨超不羣可憐前此無管領欄干罩網蛛絲塵
相攜暇日足登覽晝長正度南風薰冰盤朱李冷熨齒

雪絲細葛輕襯身飲酣神王氣浩浩半空笑語驚人
墨圓新磨紺於漆大字題成泣鬼神交酬錯勸互賓主
雅論諧談肺腑真觚稜掛月筵初散歸從傳呼紛若雲
英游便可誇盛事緇流勿訝吾來頻

甲辰歲朝把筆

四十五番見除夕稍知慚愧此之日小時辛苦習科塲
惟恐一官身未得二十七歲方塵忝又閱八年初實歷
又閱十年滿兩任汲汲皇皇望通籍况逾百指家累重

陰瞻浩穰憂不給所以中心懷踏跼每至歲朝常戚戚
前年涉險趨淮幕去年舉剡甫及格猶自奔波趨班見
來往時時在塗陌今年事定已改官分邑不遠近鄉國
秋風行可報瓜熟便得怡愉奉慈色所以親邊知自幸
笑語團樂竟通夕雖然丈夫致君澤民事業匪僅此要
是此去無限隔但辨勞心供撫字忠信尚可行蠻貊斷
不依阿事嫵媚亦不聚斂求封殖升而戾天沈而淵一
聽天公無固必若綴班行儘向高爐香夾侍螭坳側剝

擬抗論高回天粗有外氏之遺策或分一壘向邊疆願
作長城如李勣霜臺直筆屏姦回機幕飛毫草文檄更
令小試經綸手黼黻曾夢江淹筆不然種花蒔藥老海
濱却覓長年當官職

食雪

君不見蘇子卿十有九年留朔廷牧羝未乳歸未得吞
氈莫救飢腸鳴又不見陶學士家居三冬足文史玉堂
退直清興生謾把烹茶誇婢子我生徒飽太倉粟慨懷

伊人常縮恧我才又無揮翰手食此豈不顏增厚浪游
枉自在江湖幾年見雪一語無只同兒童跳梁喜欲吟
自覺腸乾枯朔風打頭夜來泊擁篷曉見銀模糊銀盤
收拾和蔗漿銀匙攪碎紅珊瑚一抄入口清風生再抄
乍覺心眼明連抄疾啜盤已竟肌膚起粟神魂輕食罷
拱手謝蒼天小儒不學食露盤無補多慾妄求僊願言
片片皆詩料吐吞造化歸毫端亦不吟河橋送別淒涼
句亦不吟依本胡蘆取天怒但願冰稜雪塊在心胸飄

飄解做梅花賦

斬偶行安吉州小民之頑兇者土偶刑餘之囚
祝之以起兇傷守倅斬而絕其姦

君不見昌黎諫佛骨竟莫遂請水火投中丞擊妖蛇此
蛇初不為民尤寧如立斬興妖偶卓哉偉見吾邦侯吁
嗟三輔州尚鬼逾蠻酋此輩生身已麗法尚何智慧靈
諸幽惟伊姦兇愚爾俗假憑威毒相仇讐依乘土木作
幻怪竊取血味神其謀除兇破偽若一劍較功韓孔茲

為優嗟嗟願公寶此劔更煩借截姦臣頭

送朱文倉試刑法科

士業讀書讀律恥亦不屑至其有以男兒奮身自力耳
有足成功奚擇地誦德科條似流水筆端端可判生死
用之自貴勿輕視贈君飽霜毫錐子萬毫齊力鋒穎銳
庭陰未側可萬字十問俱通策勳易即次風雷星斗位
還取儒科濟世美更贈一言君我記終身行之恕而已

厖蚓圖

金匱要略卷一
卷一
一蚓蜿蜒行燥土定是明朝天作雨六尾酣慙初眈乳
乍見異物吠驚覩老厖垂涎傍晚顧此心亦以舐犢故
鶉衣百結多兒女錦屏鴛鴦帳輒獨處

送馬上嬌圖與秋壑監丞

繡韉金狻玉蹠躐天寶繁奢逾大業華清浴已宴沈香
弓箭才人擁旌節前頭樂部紫雲回催駕顯迎奏三疊
阿瞞駐轡立多時欲上花驄尚嬌色俯頭絕韉力士徒
曾以脫靴為屑屑步步相隨那肯離嘗聞願作連理枝

燕安儻及思艱危
邠有馬嵬攀訣時
漢家山河安四維
披香千秋惟弋綈
龍眠畫茲非
銜竒端與曹高
向孟陳元龜

秋壑納室慶席諸友分韻

蘆葦戰風聲
颯索細雨吹
絲冰簾箔暖
盤醉客珠履
喧聳鸞筆飛
璣唾落詩人大
義在切磋
曳裾彈鋏籍
若何正倫風
化理不二御
邦即是家之和

採桑曲

桑椹紫來蠶務急帶曉採桑桑葉濕屋頭綠暗勃姑啼
柱礎朝朝汗流出人家蠶老婦勤苦銀釧忙催隔窓霧
方花古博袞香絮院靜簾垂明燕語沉炷銷來烟半縷

賣鏡

賣明鏡怕明鏡從來面瘦兩高顴况復星星添鬢影世
間萬事只宜晦明鏡何須炯相對鏡明賣却昏不磨從
教雙鬢雪婆婆

青春能幾何

青春能幾何青春能幾何蒼髯紺髮看成皤亦有紅顏
嫩於花東風馳道屬誰家可道光陰流電轉草上霜飛
峭如翦心如不知恍重見心語不通惟見面重見面愁
轉多歸來銀燭炯長夜歎息青春能幾何

青春能幾何青春能幾何日烏月兔去如梭膠粘難安
枝上花頗惜相逢殊草草中心有言不復道鵲喜傳訛
易顛倒想得也應生懊惱謾自有千金無方駐臉霞休
言洛陽看花伴經年浪蕩不歸家君不見青春能幾何

二禽言戲贈難弟

歸歸歸

西浙暮春有禽鳴
連三聲皆叫歸

歸歸歸三月將盡方始啼
木林翠密陰成幄
花片紅
風蕩飛歸歸歸汝既勸歸胡不歸
歸來深院日正長
煮酒菖蒲玉屑香
醉眠藤牀覺晚涼
須臾月色到回廊
歸歸真箇歸來樂未央

篤篤篤

此啄木兒也因
其聲以謂之

篤篤篤日長正午睡
初熟誰其扣門訪
幽獨見他利啄

啄枯木枯木中間能有幾小蟲何足飽爾腹盡日勞苦
食不足篤篤篤篤此聲尚且聒人耳人之多言寧不瀆戒
之哉篤篤篤篤

--	--	--	--	--	--	--	--

欽定四庫全書

藝齋文編卷二

宋 趙孟堅 撰

五言律詩十三首

庚辰除夕

生計從來拙，奚疑壁四空。
解憂惟父母，謀事等兒童。
無競身如偶，訛言耳願聾。
丈夫心鐵石，肯自泣塗窮。

辛巳除夕

歲事今其暮，而多悵惋心。
功名一成否，身世幾浮沉。
莫

甲四墻在根株百蠹侵白雲飛處遠東望動微吟

山行晚歸

背日踏寒影歸程路覺長水流逢石響花晚度秋香前
去多林莽新傳有虎狼行行應勿緩掠面已風霜

尤美亭

在昌化
治平寺

雖未及瑯琊看來亦自佳微坳著新月聳翠帶餘霞巨
鑿應靈禹斜拋或女媧小亭相對好莫放竹叢遮

夜熱

夜熟寢復起獨行池上亭
欹荷傾泣露高柳掛疎星
秋蜚已啼草涸魚時唼萍
無雲那有雨湛湛一天青

蒙齋

此閔先天地名齋曷扁蒙
祇應防太潔未必果冬烘
釀臍重醅酒初陽逗煖風
當年郭有道此意與君同

文宣公祠宇新成

旋斲萍蕪地亭臺出水瀕
人知便行樂誰識念賢臣
淡月花無影微風浪有鱗
飛梁如跨水遊子更來頻

何氏書堂

元正假得晴
楚服暫山行
遇石松盤蓋
懸崖蘭倒生
壁間題字古
潭面鑒形清
官滿應求此
讀書秋月明

鴻禧觀次高橫槎韻

逍遙微物累
出處任天真
薄宦已陳夢
青山猶故人
鑑湖涼不暑
荷葉淨無塵
往往入圖畫
扣舷歌角巾

秦望與蘭亭
山山遞送迎
尊鱸方嫩美
草木亦欣榮
去繼漢疏傳
名肩齊魯生
鴻都讀遺事
誰不動歸情

和陳魯山社日西湖二首

遶堤千障碧過雨一回新並駕館中傑分題湖上春
觴同臭味篇什倍精神招手年時燕逸歸尚及辰

海棠料客醉故作暈微紅借路山無雨惜花天不風
揚
鑣聯勝士琢句策竒功讀罷身何許晴光蕩漾中

江樓遲客

野外遊神迥望中塵物稀天連遠水盡鳥背夕陽飛
木
葉初搖落鄉懷動式微興闌不忍去遲子一舸歸

七言律詩十九首

早春牡丹

香泥封籜接頭新，幻出花王見早春。
時節不須寒食候，工夫遠勝洛陽人。
嫩黃蠟葉拳微皺，半醉宮粧粉未勻。
恐怕晚風須愛護，羅幃遮却看頻頻。

安吉州賦牡丹

眼眩繁妍錦一機，銅鈿分插遞參差。
幾於釘坐看如偶，却爲輕寒謝較遲。
僖用奢豪須藉酒，形容妖艷每難詩。

微風忽度輕披展絕憶霓裳駐拍時

謝徐正十一兄惠牡丹顏帖

左携珍帖右花王雅賦何殊照乘光
拆壁漏痕含蠶尾
珍珠露顆帶天香
數千葉密憐檀暈怕六丁收謹匣藏
答謝苦慚無好語
撚髭空斷不成章

種水芭蕉

石上芭蕉手自移
黃梅便得雨如期
水根聯絡銀絲漾
風葉紛抽羽扇欹
日驗發生疑有準
心加愛護每忘疲

猶如老大初生子及見成人長立時

初冬客中見小春海棠

一痕朝日界晴窓森肅清寒昨夜霜硯怕生澌微貯水
爐因撥火起餘香最耽詩帖閑中樂無奈塵埃客裏忙
却是小春花謝絕海棠經月駐紅粧

客中

睡覺簷牙月一鉤適閑真不願封侯病多藥裹長爲侶
靜著爐薰轉更幽席上眼明梅破臘霜餘珍重菊經秋

從茲可向家居否強半經年在客舟

和帑院叔

久居朝蹟遲遷次雖在琴齋頗寂寥交少自應無援拔
地寒安得有肥饒桃花落處春風緊梅蘂開時臘雪銷
畢竟徐行能遠到樽前贏得且逍遙

及書六考喜效白體

無庸下考又三書知愧知慚意少舒僮便盍簪叨墨綬
縱然休仕亦緋魚何人不願重金服那箇無心駟馬車

修短洪纖應賦定好存方寸一由渠

不寐

不夢華胥仍不醉燈青室白自高眠頻聞乾葉下空砌
遙認征鴻唳遠天慮淡殊非同槁木無營豈復在韶年
回思撲漉紅塵久虧損工夫只自憐

邑圃池上

南薰初愛葉田田忽見莖枯欲倒懸風露漸淒生澹泊
水天相映作澄鮮無人領會微吟意獨自咿唔薄暮天

一對陶朱山下鷺飛飛衝破晚炊烟

養鷓鴣

護毛不用籠寬織半殺彫翎養自馴退易進難微鶴歎
涼來炎去異鴻賓橫枝梅下眠和月臨水薇邊遊近人
更著花栽安薛石黃筌圖畫鎮長新

十日同憲僚登高

自嘆淒涼客寄身已孤茱酒奉慈親未應一夜無芳菊
共上層樓有可人日射寒山宜近晚霜殷秋葉艷於春

清歡率爾吾儕事帽落龍山意更真

讀元舅雪溪先生墓銘

二祖霜臺有烈聲傳家文憲見先生剛而不折松筠壽
貧弗濫求冰玉清陶令秫田詩料足竇家桂子義方成
即茲更有高賢傳豈羨區區世上名

拜掃易齋先生墓

行樂今非少壯時一樽聊以酌吾師隻雞豈敢方前輩
下馬猶能慰所思原上松杉新種植

巨濟兄近為
先生栽松杉

望中

桃李半披離歸途劇飲賡新句顛倒綸中不自持
隻雞斗酒禮雖微苦雨終風志不移卧病已辜寒食約
踐盟猶及小春時老懷傷感渾如舊同舍追陪尚可期
少憩東湖勿忽遽片雲來往正催詩

寄湯帳幹

鎖窓寂寞守燈熒熟數陳蹤迹杳冥已自無心雲淡淡
不應逐計鼠營營發生最普惟春力幽隱旁昭是月明
試品梅花霜下角動人深淺似秦箏

招石希孟朝飯

水臨軒檻絕纖埃砌面茸茸上綠苔
伺餒金鱗渾可狎
低飛翠羽不生猜篆薰欲起筵初集
清磬纔敲夢恰回
正好西風坐蕭爽官程翻怕驛書催

與帥幹架閣宗叔

山中翁之子

曾聞老吏說先猷咳唾珠璣下筆適大器
莫爲時所用
高科還有子能收相逢禹會嗟何晚薄可郊
寒匪暗投
珍重斯文肯勉力清朝墳典要人修

寓言

詡詡言詞巷陌兒傾心反目易安危可嗟香盡蝶猶戀
誰謂機萌鷗不知寥落丹青秋後扇縱橫黑白局中碁
料應主意非疎賈其奈難祛絳灌疑

五言長律詩一首

追詠西湖行樂寄傅清叔

聞借侯家宅湖邊度夏涼鐘魚連梵寺雉堞傍城墻閑
適心無事清和日正長藕花雖尚稚荷葉自多香苦笋

回餘味青梅弄半黃生綃畫團扇細葛製輕裳水近風
生座簷虛月滿廊龍舟花漿楫駟馬紫條韁竟日歌聲
沸通宵水面光不妨投轄飲更稱靜琴張詩社聯行卷
仙姝學道粧英遊伴王謝清夢到羲皇曾約陪遊蓋慚
稽動客檣憶君徒悵望爲我細思量幾度吟成後憑誰
遠寄將意多收不盡事鄙每牽忙今夕微醺起中宵捉
筆狂浪吟無次第聊表未遺忘

七言絕句詩二十五首

九里松馬上作

九里松株不斷青
松風上發下泉聲
耳邊為愛聞天籟
故約遊韁緩緩行

送客

素娥懶駕水晶輪
此夕飛來夜欲分
送客出門還獨立
一天清露湛無雲

臨安客中

小樓面面著疎櫺
靜有蟾光絕市聲
讀罷離騷臨晉帖

菊花香裏數寒更

折枝

奚囊金勒逗春行
醉咏歸來隴月生
折得生香渾懶向
斷簷零珥任縱橫

清明

節近清明長是陰
黃花間在麥苗深
勸行却上高樓望
烟鎖前村一半林

經過

二十年前漫浪遊海天
霜氣夜深浮竹牕
夢斷聞雞處
常憶溪灣塢聚頭

南林張園

淒淒寒菊委霜叢
下有微吟腐葉蛩
倚著欄干聽不了
自來我輩最情鍾

種石菖蒲

少年眼力健觀書
卷裏千言一覽無
官事簿書昏惘惘
效尤石上種菖蒲

蕙花

光風蕩煖曉晴天雅有幽香入簡編
尋見堊花都不是
山蜂引到石崖邊

夢回

點點桃花短短墻雨聲徹夜響迴廊
覺來蝴蝶家山夢
一半分明一半忘

贈術者

紛紛塵土簿書堆職在其間怎可辭
不向先生問榮達

但言何日是閑時

買硯碑

鳳城涼雨新秋後幾處朱樓試管弦有客貫金收古歛
短檠竟夕自摩研

恰在貫金酬硯直又逢古洛蔡公碑摩挲不忍教他去
笑殺典衣償直時

問梅寄賈秋壑先生

生成欲見化工功不在漫山桃李中爲向梅梢問消長

地寒先却得春風

天平方丈梅下見持要舊題

枯梅一樹半斜歌繞匝行行欲詠詩忽覩季難遺墨在
西風吹淚滿鬢絲

謝送牡丹

官舍無花甌有塵縱將畫展不如真若非折寄珍珠顆
幾是蕭條過一春

蘸蠟封枝翦處新開奩帶露尚精神洛陽路遠風塵暗

腸斷應無做譜人

高渭南席上燭照牡丹

高燒燭照御黃衣疑是沈香夜宴歸固是不教花睡著
只愁驚起露蟬飛

日午猶睛一線時紅媽紫媚正猖披爭如絳蠟通宵照
玉葉金鬚色愈滋

題玉川月蝕詩後

哆口堵牙月蝕詩遺編讀著凜風規如何晚節從汙合

竟與姦臣血作泥

題趙大年小景

霜輕榆柳未全黃
兩岸菰蒲洲渚長
鷗鳥背人飛撲漉
西風嘗是入斜陽

一行白鷺過前山
飛去沙鷗半復還
更有精能君見否
黃鸝兩兩綠楊間

客中思家

微風過處有清香
知是茶蘼隔短牆
相得故園成索寞

詩盟誰復為平章

楚楚輕衫翦薄紗而今憶得在山家
蕭娘為是親蠶事
嗔帶含香紫笑花

柳絮悠悠拂面輕隨風到處若為情
西池應也無人到
一面青青萍自生

詩餘

過天下第一江山呈何守

沁園春

許大江山鎮臨彈壓豈小任哉從蟠冢導漾東傾注海

截然限止南北天開試向中流迴觀鐵甕萬石層稜攢
劍堆金焦峙號紫金浮玉捲雪轟雷 君侯文武兼才
天有為生才南國來歷二十年籌邊給餉上流襟要幾
為安排今此雄藩精明笳鼓又喚金湯氣象回長淮北
望中原非遠更展規恢

巖桂和韻

鵲橋仙

明金點染枝頭初見四出如將刀翦芳心纔露一些兒
早已被西風傳遍 歸來醉也香凝襟袖疑向廣寒宮

殿便須著箇膽瓶兒夜深在枕屏根畔

賞春

沁園春

曉上畫樓望裏笑驚春到邨家便從史閑情安排醉事
尋芳喚友行過平沙最是堪憐花枝清瘦欲笑還羞寒
尚遮濃歡賞待繁英春透後會猶賒 歸時月掛簷牙
見花影重重侵寶塔銅壺催箭獸環橫斜濃斟玉醕芳
漱瓊芽步繞曲廊倦迴芳帳夢徧江南山水涯誰知我
有牆頭桂影牕上梅花

客中感春

朝中措

擔頭看盡百花春
春事只三分
不似鶯鶯燕燕相將紅
杏芳園名韁易絆
征塵難浣
極目銷魂
明日清明當也
柳條插向誰門

前題

好事近

春早峭寒天
客裏倦懷尤惡
待起冷清清地
又孤眠不
著
重溫卯酒
整瓶花總待
自霍索
忽聽海棠初賣
一枝
漆却

初任官所為慈闈壽

感皇恩

官小宦遊初清貧如舊小簇杯盤旋斝酒雖然微祿不比他們豐厚也知慚愧是皇恩受富貴千般享之惟壽心地平時到頭有摩挲銅狄祝望比他長久鼎來榮貴待通闈後

次任為慈闈壽

感皇恩 是年慈闈六十二歲本命後一年也

一百二十年兩番甲子前番風霜飽諳矣今番甲子一似臘盡春至程程有好在應慚愧莫道官貧勝如無

底隨分杯筵稱家計從今數去尚有五十八生朝裏待
兒官大做奢遮會

清涵萬象閣

風流子

望極思悠悠江如練籟息浪紋收看帆卷帆舒往來征
艇鷺飛鷺立遠近芳洲遊波不舍山常好祇白少年頭
杜若滿汀離騷幽怨鷓鴣夷去國煙浪遨遊 江南知何

許青林晚山斷處白雲浮懷古慨今誰人似我閑愁嘆
醉生浪跡鱸鄉蟹舍帶紅怨粉蓮棹菱舟敲遍欄干默

然竟日凝眸

春日詞

院花心動春外祖中司常公春日詞曰庭

隨風不拘管飛入洞房人不知畫堂繡幕垂未

戶玉爐消盡沉香炷半褰斗帳曲屏山盡日梁

間雙燕語美人睡起欽翠眉強臨鸞鑒不勝衣

門外鞦韆一笑發馬上行人腸斷歸近日風雅

遺音多譜前賢
名作因效顰云

庭院深深正花飛零亂蝶懶蜂稀柳絮狂蹤輕入房櫳
悄悄可無人知畫堂鎮日閑晴畫金鑪冷繡幕低垂梁
間燕雙雙並翅對舞高低蘭幌玉人睡起情脉脉無

言暗歛雙眉斗帳半褰六曲屏山憔悴似不勝衣一聲
笑語誰家女鞦韆映紅粉墻西斷腸處行人馬上醉歸

初改官為慈闈壽

葛山溪

幾年修績總待榮親老每羨阮南豪向壽席花花草草
如今慚愧微勝十年前聊尔了辦杯盤一對慈顏笑
願親强健綠髮長長好來歲在琴堂想凡事應微熟鬧
契天交道只辦好心腸官儘大儘榮親待受金花誥

怨別

葛山溪

桃花雨動測測輕寒小曲檻面危欄對東風傷春懷抱
酒邊心事花下舊閑情流年度芳塵杳懊惱人空老
粉紅題字寄與分明道消息燕歸時輟柔茵連天芳草
鎖窗孤影夜卜燈花繁清漏斷月朦朧掛在梅梢裊



